

## Earth Hour 60+: UMS Padam Lampu Demi Masa Depan Cerah

Terakhir dikemaskini: Isnin, 01 April 2019 14:40 | [Cetak](#) | Jumlah paparan: 238

[Kongsi 55](#)[Syorkan 55](#)[Kongsi](#)[Tweet](#)[Share](#)

ISNIN, 1  
APRIL -  
Universiti  
Malaysia  
Sabah (UMS)  
melalui Exco

Keusahawanan dan EcoCampus, Majlis Perwakilan Pelajar Sesi 2018/2019, Pusat Pengurusan EcoCampus dan Jabatan Hal Ehwal Pelajar turut sama menjayakan program Earth Hour 60+ 2019 baru-baru ini.

Bertempat di Padang Kawad UMS, kira-kira 1,000 orang peserta dari kalangan pelajar dan kakitangan UMS serta orang awam turun padang bagi sama-sama menjayakan program tersebut, yang menyaksikan lampu di dalam kampus dipadamkan selama sejam bermula jam 8.30 malam sehingga 9.30 malam.

Menurut Pemangku Pengarah Pusat Pengurusan EcoCampus UMS, Kueh Boon Hee @ Kelvin, program tahunan tersebut bermatlamat untuk memberikan kesedaran umum kepada warga UMS, khususnya para pelajar, tentang kepentingan pengurangan penggunaan tenaga dan penggunaan tenaga secara lestari dalam kegiatan seharian, selain sebagai perkongsian ilmu dan kemahiran berkaitan dengan usaha mengatasi pemanasan global dan perubahan iklim serta memupuk semangat tanggungjawab bersama yang utuh sesama para pelajar UMS dalam menjaga Bumi ke arah suatu masa depan yang lestari untuk semua.

“Adalah amat mustahak untuk kita semua menjaga alam semula jadi dengan sebaik mungkin kerana nilai dan rangka minda pembangunan lestari sudah menjadi salah satu kualiti terbaru yang paling dikehendaki daripada para graduan universiti, khasnya oleh syarikat gergasi multinasional.

“Usaha ini juga adalah selari dengan Agenda EcoCampus UMS yang berpaksikan lima nilai teras dan enam elemen utama berkisarkan hasrat untuk menjadikan UMS sebagai rujukan serantau dan sedunia dalam pengawasan alam sekitar melalui kecemerlangan dalam pengajaran dan pembelajaran, penyelidikan, pembangunan infrastruktur, pengurusan, amalan operasi dan pengalaman kampus,” katanya.

Sementara itu, Ketua Jabatan Hal Ehwal Pelajar (JHEP) UMS, Kamisah Husin ketika mewakili Timbalan Naib Canselor (Hal Ehwal Pelajar dan Alumni), Prof. Dr. Ismail Ali menyampaikan ucapan perasmian program

tersebut berkata, JHEP sentiasa menyokong program bermanfaat sebegini yang mampu memberi pemahaman yang mendalam kepada pelajar terhadap objektif penganjuran program tersebut.

“Penglibatan aktif para pelajar juga penting dalam memainkan peranan sebagai penyedia penyelesaian kepada pelbagai isu dan cabaran alam sekitar dewasa ini,” ujar beliau.

Beberapa acara menarik menjadi pengisian pada program tersebut, antaranya persembahan ‘Yoga Under The Stars’ yang diketuai oleh JV Yoga Therapy Center Kingfisher, Senamrobik oleh Kolej Kediaman Tun Fuad dan Persembahan Busking Akustik oleh Kolej Kediaman Excellence, selain pameran berkaitan kelestarian alam sekitar dan pembangunan lestari oleh beberapa pertubuhan bukan kerajaan (NGO) – Taiwan Buddhist Tzu Chi Foundation Malaysia, Little Feet Initiative (LiFe), Young Leaders For Sustainability (YL4S), AIESEC Malaysia (Sabah), dan Jawatankuasa Foundation for Environmental Education (FEE) UMS

Turut diadakan acara penyediaan simbol besar ‘60+’ daripada lilin yang diperbuat menggunakan minyak masak terpakai dan diletak dalam bekas yang diperbuat menggunakan botol minuman plastik serta satu pagar sesat (‘maze’) yang disediakan daripada botol minuman plastik dan kotak kertas terpakai juga dipamerkan yang mana kedua-duanya menarik perhatian ramai orang.